



Uunga
Inatsisartunut ilaasortaq
Debora Kleist
Inuit Ataqtigiit

25. oktober 2017

Ulloq unnuarlu paaqqinnittarfinni Namminersorlutik Oqartussanit pigineqartuni perorsaasut ilinniarsimasut qassiuneri pillugit § 37 naapertorlugu apeqqutigineqartup nr. 228-p akineqarnera

Asasara Debora

Ulloq unnuarlu paaqqinnittarfinni Namminersorlutik Oqartussanit pigineqartuni perorsaasut ilinniarsimasut pillugit apeqqutigisannut qujanaq.

Akissutigisakka tullinnguuttuni takuneqarsinnaapput.

Namminersorlutik Oqartussat ulloq unnuarlu paaqqinnittarfiit 18-it ingerlatarimmagit aallarniutigalugu paasissutissiissutigissavara. Qulit meeqqanut inuusuttunullu, taakkunanga marluk aamma inunnut innarluutilinnut paaqqinnittarfiullutik. Paaqqinnittarfiit arfineq-pingasut inunnut innarluutilinnut.

1. Namminersorlutik Oqartussat pigisaani ulloq unnuarlu angerlarsimaffinni perorsaasutut ilinniagaqarsimasut qassit ullumikkut atorfeqartinneqarpat?

Namminersorlutik Oqartussat ulloq unnuarlu paaqqinnittarfinni 2017-imi katillugit atorfiit 351,5 piffissaq naallugu perorsaasunik atorfigineqarput. Taakku atorfiit perorsaasunik 107,5-inik atorfigineqarput. Kisitsisini ilaapput pisortat, tullersortit aamma immikkoortortani pisortat. Tassa imaappoq atorfinni taakkuusuni 30,58 %-it perorsaasunik atorfigineqarput.

2. Sulisorineqartut allat qanoq ilinniagaqarsimasuuppat?

Sulisut ilai isumaginninnermi ikiortitit ilinniarsimapput. Ilai makkuninnga ilinniagarput: peqqinnissamik isumaginninnermi ikiortitit, timimik sungiusaasutut, isumaginninnermut siunnersortit, tarnip pissusaanik ilisimasalittut, peqqissaasutut, pillorissaasutut, ilinniartitsisutut, psykoterapeutit, skibsassistentit kiisalu ikiortitit.

3. Sulisorineqartut ilinniarsimasuunissaat anguniarlugu Naalakkersuisut sunik pilersaaruteqarpat?

Naalakkersuisut suliassaqarfik tamakkerlugu ilinniarnermut periusissamik tamanut atuuttussamik ingerlatsiinnarusupput, piffissamilu qaninnermi taamaattumik saqqummiiniarput.

Perorsaasutut atorfinnut tunngatillugu perorsaanerup iluani ulloq unnuarlu paaqqinnittarfinnut sammititanik ilinniarsimasunik pisariaqartitsisoqartorujussuuvoq. Ulloq unnuarlu paaqqinnittarfinni suliassanik suliarinninniarnerni pisariaqarpoq perorsaanerup iluani immikkut ittumik piginnaasaqarnissaq, taakkunanami ineqartut, amerlanertigut katsorsarneqarnissamik pisariaqartitsisuupput, annertuumik

sumiginnagaasimanermik misigisaqarsimasaramik amerlasuunillu atornartunik pisariaqartitsillutik.

Ulloq unnuarlu paaqqinnittarfinni sulinissaq kajuminnarnerulersissagutsigu pisariaqarpoq, perorsaasunut ulloq unnuarlu paaqqinnittarfiutitsinni suliassanik kivitsisartunut, perorsaasutut sulinermi atugassarititaasut pitsaasuunissaannik qulakkeerinnissalluta kiisalu suliassanut artornarsinnaasunut atortussanik piginnaasanilu pisariaqartinneqartunik peqalernissaannik qulakkeerinnissalluta.

Naalackersuisut ukiuni kingullerni pingasuni ulloq unnuarlu paaqqinnittarfinni sulisut ilinniarsimangitsut ilinniarsimasullu piginnaasaasigut ineriartortitsiffiginarlugit sulisimapput, matumanilu ulloq unnuarlu paaqqinnittarfinni sulisut ilinniarsimangitsut pikkorissartitsinerit immikkoortukkuutaanik katitikkanik ilinniartinnissaannik kiisalu ulloq unnuarlu paaqqinnittarfinni sulisut ilinniarsimasut diplomuddannelsemik ilinniarnissaannik neqeroorfigineqarput. Taamatullu sulinerup ingerlaannarnissaannik Naalackersuisut sulissuteqarniarput, tassami meeqqat inuusuttullu nunatsinni ulloq unnuarlu paaqqinnittarfinnut inissinneqartut pitsaanerpaamik atugassaqartinnissaat anguniarlugu tamanna pisariaqarluinnarmat.

4. Kommeneni ulloq unnuarlu perorsaasutut ilinniarsimasut qassit sulisorineqarnersut Naalackersuisut ilisimavaat?

Naamik, tamanna kommuninit oqartussaaffigineqarpoq, taamaammallu Naalackersuisut paasissutissanik toqqaannartumik pissarsinissaminnut periarfissaqaratik.

Inussiarnersumik inuulluaqqusillunga



Sara Olsvig